

## JONES, CADWALADR (1783 - 1867), gweinidog gyda'r Annibynwyr a golygydd cyntaf Y Dysgedydd

**Enw:** Cadwaladr Jones

**Dyddiad geni:** 1783

**Dyddiad marw:** 1867

**Rhiant:** Dorothy Cadwaladr

**Rhiant:** John Cadwaladr

**Rhyw:** Gwryw

**Galwedigaeth:** gweinidog gyda'r Annibynwyr a golygydd cyntaf Y Dysgedydd

**Maes gweithgaredd:** Crefydd; Llenyddiaeth ac Ysgrifennu; Argraffu a Chyhoeddi

**Awdur:** Richard Griffith Owen

Ganwyd Mai 1783 yn y Deildre Uchaf, Llanuwchllyn, unig blentyn John a Dorothy Cadwaladr. Ni bu ei rieni erioed yn perthyn i'r Ymneilltuwyr ac nis cyfrifid yn grefyddwyr amlwg - at yr Eglwys Sefydledig y gogwyddent. Yr oedd ef yn 11 oed pan ddaeth [Dr. George Lewis](#) yn weinidog i Lanuwchllyn, ac ef a'i derbyniodd yn aelod yn yr Hen Gapel yn 1803. Dechreuodd bregethu yn 1806, a derbyniwyd ef yr un flwyddyn i athrofa Wrecsam. Ar ei draul ei hun yr aethai yno, gan dreulio'r haf gartref ar y fferm. Yr oedd '[Williams o'r Wern](#)' a [Michael Jones](#) yn gyd-fyfyrwyr ag ef am ran o'r amser. Ym Mai 1811 urddwyd ef yn olynnydd i'r [Parch. Hugh Pugh](#), y Brithdir. 'Yr oedd cylch gweinidogaeth [H. Pugh](#) yn cyrhaeddyd o'r Garneddwen i Abermaw, ac o Fwlch Oerddrws i ucheldiroedd y Ganllwyd.' Rhoes Cadwaladr Jones i fyny ofalu am Lanelltyd a'r Cutiau yn 1818 a'r Brithdir a Rhydymain yn 1839, gan gyfyngu ei waith i Ddolgellau ac Islaw'r Dref hyd 1858. Ar ôl hynny hyd ei farwolaeth yn 1867 cydlafuriai â'r Parch. E. Davies, Trawsfynydd, yn Llanelltyd, a chyda'r Parch. R. Ellis, Brithdir, yn Nhabor. Claddwyd ef ym mynwent y Brithdir.

Adnabyddid ef fel 'Yr Hen Olygydd' gan iddo olygu *Y Dysgedydd* o 1821 hyd 1852. Daeth y rhifyn cyntaf allan yn Nhachwedd 1821 dan yr enw *Y Dysgedydd Crefyddol*. Ychydig cyn hynny cyhoeddasai bamffled yn dwyn y teitl *Amddiffyniad o'r Ymneillduwyr, mewn Llythyr at y Parchedig John Elias; yn cynnwys Sylwadau ar ei Lythyr o Ganmoliaeth i Bregethu Mr. Hurrian ar Brynedigaeth*, 1821 (gweler *Cofiant J. Jones, Talsarn*, 470). Ymddengys i [John Elias](#) ymosod ar yr Annibynwyr oherwydd eu daliadau athrawiaethol, a hyn, ond odid, fu'n achlysur cychwyn *Y Dysgedydd* gan nifer o weinidogion amlwg yr Annibynwyr ac iddynt ddewis Cadwaladr Jones yn olygydd. Daeth y cyfnodolyn yn arbennig yn faes ymryson ar bynciau diwinyddol. Profodd ei hun yn olygydd medrus a doeth; eto, yr oedd yn annibynnol iawn ei feddwl, ac yn bur benderfynol ei ysbryd (gweler '[Ap Vychan](#),' *Cadwaladr Jones*, 138). Er mai 'mab ysbrydol' y [Dr. George Lewis](#) ydoedd, eto 'daeth yn gefn i [Michael Jones](#) ym mrwydr y Sistemau yn y genhedlaeth nesaf' (gweler [Jenkins](#), *Hanes Cynulleidfa Hen Gapel Llanuwchllyn*, 113). Rhyddfrydiaeth a gefnogai mewn gwleidyddiaeth er nad oedd ei ddatganiad yn ddigon pendant gan amryw o'i gyd-Annibynwyr.

**Awdur**

Y Parchedig Richard Griffith Owen, (1890 - 1973)

## Ffynonellau

Robert Thomas, *Cadwaladr Jones, Dolgellau ei fuchedd, ei weinidogaeth, ei ddefnyddioldeb cyffredinol, a phrif linellau ei nodweddiad* (1870)

R. T. Jenkins, *Hanes Cynulleidfa Hen Gapel Llanuwchllyn* (1937), 111, 113, 115, 143, 180

R. T. Jenkins, *Hanes Cymru yn y Bedwaredd Ganrif ar Bymtheg, Cyfrol 1, 1789-1843* (Caerdydd 1933), 96

*Album Aberhonddu ... o'r flwyddyn 1755 hyd 1880* (1898), 53

*Hanes Eglwysi Annibynnol Cymru*, i, 457

## Darllen Pellach

Erthygl Wicipedia: [Cadwaladr Jones](#)

## Dolenni Ychwanegol

Wikidata: [Q20732680](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

